

難乎象故從日在下其上從屯象中穿地始出而未申以明陽回而生之意動也  
夏作熹火王用事之時取正陽合而成字明天地之盛德氣也秋作秋大火西流  
暑退而將寒禾以火王而生金王而死故從禾從火會意冬作凷四時之盡也從  
日從夆爲意別作夆從人人在下取金盛而寒也等類與賈氏說異其是否有合  
於康成之祕要皆以意逆義可得而爲言也沿及後之作者體遞變而彌離其本  
義增詁而益失其真周宣王時太史籀著大篆十五篇教學童書損益古文遂有  
同異而體變矣迨李斯刪籀而秦篆興程邈造隸而周文廢厥後衍而爲八分爲  
飛白爲行書爲章草爲楷且撰柳葉芝英垂露剪刀懸鍼纓絡金錯諸體悉原本  
於六書之意而爲之愈巧愈違使古文正字漸不可辯故頡墓碑文周時已莫能  
識至李斯僅識八字叔孫通識十二字而已杜甫云蒼頡鳥跡既茫昧字體變化  
如浮雲殆有慨乎其言之者歟詮解其義康成標目指示未是創論許叔重說文

三十卷逐字識詰夫有所受蓋漢儒去古未遠學必有宗末世獵奇而失之鑿則不免貽譏後人賈公彥疏轉注如考老之類連聲一音文意相受左右相注假借者令長之類一字兩用意似精矣然說者謂老從匕考從匕各自成文匕即化字即弓之本字非由老轉考也假借乃借此義作彼義用如能本獸名而借爲才能之能豪本豕屬而借爲豪傑之豪然則賈氏之疏猶有疏焉者矣甚矣文字之難言也舉成周一代教學之典易世不能晰其端而純謬日以之出雖大儒不免康成東漢註疏家之冠而以卯爲昧訓北曰北猶別也虞翻遂蚩其不識古文革宋之王安石學術雄跨當代韓魏公嘗謂其頗識難字一時新法仿之周官撰著字說頒行學宮而乖鑿特甚故易觀詩雅鳩波等字爲劉貢父蘇子瞻所調笑然此或有意炫奇求新而然若夫以小兔爲翫神蟲爲蠶省趙作肖易齊爲立改駟爲駟去走從隋割裂破敗體且非舊義於何存韓昌黎云凡爲文辭宜畧識字學者不

此之講而徒取爾於龍跳虎臥之習抑末也

傳

庠生常山董公傳

史猶龍

董公諱秉彝字常山睡仙其別號也趙宋時諱興者由京兆始遷華陰因家焉曾祖諱以保庠生祖諱德元考諱齊聖世有隱德公生而篤謹訥訥若不出諸口人亦無敢犯者稍長肆力於學治毛詩攻舉子業既壯補博士弟子員時邑侯簡霞山先生行誼文章爲三秦領袖公從之遊門下士未能或之先也嘗出其制藝就正於先君復齋公先君鍵關飭已當道莫能屈致獨遇公以禮貌暨沒撫柩而哭其推重有若此由是余得與共筆硯數年公亦引爲忘年交每逐甲乙之場而徐察其胸次有悠然於得失棄取外者終身不遇泊如也舍前數武集別業一所臺院修潔花樹掩映几案無他玩好惟置宋儒書數種公閱而倦倦而臥臥而醒醒

而復閱晚號睡仙其傲希夷睡洞演先天圖遺跡乎余不得而知也偶與學士文人聚談越時孺人王氏探知送酒幾壺菜幾盤或殺雞爲黍公飲食自若不計行列品數客有知公者亦弗爲公謝焉若仍創宗祀以追先立義倉以恤鄰修家乘以睦族一切質文豐儉義例精嚴如金聲而條理之畢具也如經營而攻治之落成也如物之相雜適均而班班可考也公之境遇休矣公之質行亦美矣然而公之藉藉通邑者尤莫著於擇交也狎而不謔密而能久有友三人焉若增生劉務滋之醇謹廩生雷列侯之英敏貢士楊書升之樂易是三人者自幼至老無一遺行者也設使三人者一有遺行而公將望望然去之也又使公有一遺行而三人者亦將望望然去之也故觀於三人者而公之生平大畧愈可知矣公生於康熙三十六年己卯距乾隆十一年丙寅得年四十有八子三長創基庠生次簡踵公歿又次遴庠生孫男三長濫次良又次恭俱業儒繩繩繼繼克世其業蓋積善之

報云

狀

文林郎河南陽武令史府君行狀

史 孚

先君姓史氏諱猶龍字友雲號厚菴先世居豫之鄧州元季始祖諱彥才遷華陰小溜村因家焉越九世高祖諱載言增廣生員妣氏雷曾祖諱標明崇禎庚辰進士順天武清縣令崇祀鄉賢妣氏靈封孺人祖諱克嶷妣贈文林郎陽武縣知縣妣氏孫貽封孺人父諱調丙辰進士福建仙遊令晉贈文林郎妣氏王又繼氏雷氏王氏馬晉封孺人公元配王孺人出也少穎悟四歲失恃祖妣孫孺人愛之甚亦教之嚴紡績之餘伴以終夜勤讀飲食坐立必導以法度繼母王孺人常因收藏冠物失謹勵色相加公受之恬如家人以爲有古孝子風方是時仙遊君舌耕於外公課徒於家薄田三五畝養殮不給先世僅有庄基一所亦爲宗族所併公

父子煢煢孤立至依場廬以居而恬淡謙退愈苦愈堅甫弱冠舉於鄉時仙遊君已宦遊福建數月思解組親友有以道遠家貧勸留者公適自都中省親至即先意承志奉之北歸母舅王公先歸卒於旅次公途中聞之頓絕方蘇仙遊君責其愛舅氏太過公遂色養如平時仙遊君喜曰天性之篤奉教之勇吾子有焉歲乙丑以明道進士第一任富平教諭遵庭訓十則論文課士數邑之士從之富平金蘭三益諸會皆從公始得富邑人歡心適鄉不寧結連徒衆公單騎往諭邑中以寧至新聖廟修垣牆任人度工碑文備載省誌大尹王公以廉聞後掛吏議親友皆遜去公始終周卹之仙遊君至學署憫其清苦居數月歸家公一日公務之餘怔忡不寧驚曰吾親其有恙乎即告假旋里比至三日而仙遊君卒仙遊君元配王孺人葬始祖先塋之次仙遊君遺命耐父母塋既定兆域宗族有爲梗者公以理諭伊捏稱十餘次或勸呈縣伸理公曰吾父既讓陽宅於人寧於之爭陰宅乎

遂改卜焉時囊空如洗盡典衣物營葬具耐棺耐身無不盡禮既而絕糧累日教徒自給從不干預外事常謂人曰求人以自贍吾不爲也起復補神木地屬邊城文治未洽公講學論文士風蒸蒸然日上登講堂請業者常數十人衣冠森列漣番使因貢回閒遊至舉比齊整稽首而去秩滿進京授四川金湯尹陛見改河南陽武縣知事到任以勤儉爲士民先常衣布衣非公宴節慶未嘗私御酒肉書役素華飾皆化之時值大旱飛蝗頓起不憚數十里之遠步禱河干親打蝗蟲分役督責終日汗流單騎往來境內以寧夜行禁賭村落皆其熟識凡大廈茅屋戲架有招賭者盡發之惡風遂息陽地多盜公不惜數白金設方求其必得即竊盜亦皆簿記居處遠近後遇失狀以地度之無不奇中或遇命案遠近報至等時即行罪人不得不肯回衙故凶犯從無逃逸初案山積晝夜審問至廢寢食後亦漸覺無事初糧欠有數十年連年帶比牽引無數公分年限次地征比至奇零若干石

捐俸解納示諭准免邑中有正誼書院基址荒廢公捐俸重修置學田數頃士風丕振公餘手不釋卷刻仙遊君文集及所輯志學要言從政名言鏡古編等書修己治人一准先儒年四十五歲丁繼母馬孺人憂哀毀踰禮遂以目疾致仕陽人如失父母大中丞吳公謂察屬曰此一路福星也當強致之而公已堅臥不起矣歸家閉戶授讀有以橫逆加者多方避之置祀田立義學設義倉凡可以恤宗族育人才者悉樂輸不吝教人先禮法而後文義以小學近思錄爲根柢濂洛關閩之書以次授讀論文必歸先正晚訂世德堂藝文一卷語錄雜著間有存者字將彙集付之梓人病革前一夕猶危坐剃頭洗足召親族呼字曰此手未嘗爲非禮之事此足未常踐非禮之地即居官以來亦未常貪非義錢財爲汝等遺禍也性素節儉蔬食布衣常言非爲省錢如是身心便安亦退修之分也平居善於誘人士農工商各如其人以相勸勉聞者悅服餘俱載自爲墓誌文嗚呼先公以嚴毅

之性充養和平與物無忤而不拘乎俗依禮而行而無拂乎人存心濟物見利思義遇事果確出慮通屬在親友各有見聞字荒迷失次不知所云今將塋葬事謹述家世行實及歷官以來居心行事之大概以求表於大君子焉

跋

孫虛齋授經圖跋

李汝榛

此余友孫君分經教子之圖也觀此可以知君之所得矣君早歲稟承庭訓攻儒業或有以宋人語錄勸君者君諦之曰唯吾且有以探其本也乃肆力於經旁及詩古文辭弱冠蜚聲藝苑隸博士弟子食廩餼既而秋闈中副車親串勸其詣成均爲仕宦地顧君毅然不屑益沈浸典籍未幾果以經元舉於鄉兩上春官不售退而教學於家主雲臺書院講席執經請業者戶外屢恆滿與槐市並稱矣君有肖子五瑤瓊璠璣玖皆能不成義方鴈行鬢序人比之寶氏五桂云君燕居家塾

五子者星聯珠貫羅列於前君乃一子授一經與之辯晰奧旨一室之內五經紛綸父子兄弟慈友恭孝雍雍兮其樂逾於南面百城矣瑤等繪圖爲誌以垂淵源歲丙午夏五值余佐輯邑乘寓於太和道舍君次子瓊捧圖視余余展觀之餘肅焉興慕而不禁有感也邇來空疏無術之輩假借理學以文其淺陋學者蔽於所欺幾至束經高閣夫宋人說理未嘗離經漢人窮經未嘗悖理今但拾前人唾餘高談性命謬詡作人或考其行而齷齪乖戾識者鄙之何如經明而行修者之所獲爲多也然則披此圖者憬然而悟知所由斯匪徒孫氏永似續也已

槐堂跋 代作

李汝榛

朝廷設官官雖微無無衙之官靈寶典史曷獨無之前官僦屋而居久矣余乙未歲承乏於茲歷十有五年未之或易夫典史司獄官也署置必密邇圉圉則稽察防範方便今假寓縣治衢南道途紆遠視聽頗疏膺是職者恆不勝惴惴焉歲戊

申堂憲李公蒞任初垂詢規制即以爲匪宜周市相度得衙西書院故址附近狴  
牢乃申牘請於上憲均蒙曰可爰割其半捐俸創建撤廢增新廳事吏舍悉備於  
是典史之衙始名而設官之制亦副落成余製匾以誌其事而顏之曰槐堂蓋以  
堂之前雙槐修茂是向者山長錢來山人所手植者也條柯猗蔚垂陰廣長楊子  
雲所謂玉樹菁蔥此其匹歟余諦惟槐之爲言懷也俾後之官斯官者懷肇造之  
功於罔替也若云擬吾家晉公之言而書則左矣

爲圃齋跋

代作

李汝榛

衙旣建東側得隙地一區瓦礫叢堆蒿萊旣蔓不治將成廢墟飭役荷番芟焚平  
夷潔淨橫三丈縱二十弓望之曠如也於是相其物宜則叔重所謂種菜者可乃  
編町比次如棋局因時布種列畦而生于采于湘雖不比吳寧蜀巢爲高賢嗜而  
春韭秋菘亦足以佐我饘粥且鑿井垣旁以資汲漑俾僕輩不疲於抱甕之勞空

開處雜植竹梅桃杏庶春風冬雪差慰寂寥此小園也賦無煩開府吟不倩少陵  
構齋三楹而自榜之曰爲圃竊有契乎聖門弟子之請者矣昔宋查湛然任館陶  
尉與妻菜蔬爲粥以療飢史稱其廉介余茲未能仰繼前人然舒綠涵青俯拾即  
是余藝之而余茹之不假官物東坡云食力免內愧余又何求顧所願在斯毋乃  
爲聖者訾歟

天花精言跋

李汝榛

天花精言者刑部郎中洛陽大宣袁先生所立也歲丁亥予需次都中數與先生  
晤先生以扁氏術騰譽京華偶談及痘症先生手授是書并云予爲諸生時因小  
兒女屢爲痘瘍不勝惕懼聞鄰邑生張君精此業寓大梁書院遂裹糧從之遊三  
年而始傳其藝是書悉張君之旨論也精之可爲嬰孩之慈航矣予捧閱之則原  
委了了植議精確且多發前人之所未發而不詭於理較之治痘諸刻分外清晰

的當誠撫呱呱者之金丹也先生刻之歷下家荆嗣與先生同官復又授之劄劄蓋均一保赤婆心也嗟嗟先生任秋部持律寬祥多所平反其成此書也知仁人固當如是忻然而遂爲之引

借棲齋跋

代作

李汝榛

已亥冬杪來承此邦丞之衙分置古號之郭數椽矮屋求一掃地焚香而坐者訖無半間烏從睹竹洞月臺大有佳處衙東垣外爲某某許君之居閒嘗以此揀話君慨然割其楹畀余余遂畧加修葺公餘假息其間頓覺西山滴翠於簷霽東澗流聲於窗眼浮氛都豁淑氣徐氤竊喜不墮落俗吏圈套中也晉潘安仁任虎賁中郎將寓直於散騎之省以今仿昔差爲勝之顧余清風愧於攜鶴拙政等諸放鳩荷斯雅意圖表高情乃削木規區而文之曰借棲匪假永烏言懷蓋以道乞鄰之故云爾因跋數語以識

翁潭溪先生書佛公祠記帖跋

李啓訥

書家各有原本習書者自能言之書家各有會心鑒別者未必能知之自晉唐以至今日名流翰墨指不勝屈筆法行白骨力氣韻師法捨短各不相襲然細推其祖述之人流風餘韻自現於楮墨之外此佛公祠碑係潭溪先生老年所書筆筆精到原本永興然察其筆法氣韻實從定武蘭亭得來唐碑晉帖強半漫漶學書者既解用筆得此日日習之亦可以追蹤晉魏平視宋元

鐵梅菴先生書澹泉記帖跋

前人

鐵梅菴書追蹤季海寢食平原稜稜風骨別饒逸趣此澹泉記有不空碑之骨力而無其放縱有多寶帖之朗潤而去其滯相雖不必與唐人爭席要是文房佳玩

金石

漢西嶽華山廟碑

建立年月撰書姓名詳舊志 清雍正元年翻刻如皋姜任修以王無異本

摹勒上石 乾隆四十三年學士大興翁方綱手摹足本商邱編修陳崇本

校刊上石

漢殘碑陰

是碑雖為數塊殘石接合而好古者每珍重焉民國十七年失

後魏華嶽碑

金石目錄 三百二十一字 王宜輔山志 魏華嶽碑劉元州書今廢

後周華嶽廟碑

周天和二年造方紐于瑾撰趙文淵字德本書

唐元宗御製西嶽太華山碑

至明嘉靖四十一年九月委官華州知州四明陳應麟華陰縣知縣臨汾李

時芳重修禮部儒士邑人楊九經書

述聖頌

達奚珣撰頌呂向銘并正書民國十八年失

昭告華嶽碑

唐韓賞祭西嶽文碑韓擇木八分書天寶元年四月乙亥朔十日甲申碑在

述聖頌碑陰之右民國十八年失

宋齋醮碑

在邑南八里華山堡北竹林內湮沒土中民國十四年爲軍人閒遊掘出字

迹剝蝕多不可讀後有華陰縣丞陶翰撰京兆韋騰書及大中祥符六年九

月十七等字華嶽志紫微觀在仙宮觀東北相傳華山村即觀址也有宋祥

符碑在村北竹林

宋勅賜西嶽乳香碑

韓見素撰文

宋修西嶽廟碑

宋建隆二年八月初六日建楊昭儉撰文

陳搏福壽碑

碑字均徑三尺許旁鐫陳搏書三字今在嶽廟內墀旁按山東青州府雲門山石壁亦鐫有希夷所書福壽二字字形較小體亦微別

希夷石室碑

題云希夷不仕宋故乃託幽居穩睡心常醒逃名意自如白雲堪作伴青鳥時相背一片真機括付與太華嘯天啓癸亥春三月濮陽邢汴書

明太祖夢遊西嶽碑